

**Минҳожиддин МИРЗО**

*ВИСОЛ  
ХАБАРӢ*

**Шеърлар**

Ўзбекистон Ёзувчилар уюшмаси  
Адабиёт жамғармаси нашриёти  
Тошкент—2003

## **Минҳожиддин МИРЗО**

Висол хабари: Шеърлар. - Тошкент: Ўзбекистон  
Ёзувчилар уюшмаси Адабиёт жамгармаси нашриёти.  
2003 йил. - 56 бет.

©Ўзбекистон Ёзувчилар уюшмаси Адабиёт  
жамгармаси нашриёти, 2003 йил

## «РУҲИМГА ПОК МАҶВОЛАР КЕРАК»

“Сўз —менинг руҳим”, — деган экан Уолт Уитмен. Демак, шеър — руҳнинг кўриниши. Кўриниш, бир қарагандা, шунчаки, зоҳирга дахлдор жиҳат. Зоҳирдаги мавжудлик. Лекин унинг замирига чуқурроқ сер солинса, назар ташланса, ботиннингда тарзи эканлиги аён бўлади. Қузатув — зоҳир, ҳис — ботин. Таассурот — зоҳир, англаш — ботин.

Истеъодди шоир Минҳожиддин Мирзонинг битикларида қузатув ва ҳис, таассурот ва англаш, яъни, зоҳир ила ботин уйқашиб келади. Яна бир томони, мушоҳада ила туйғу бирикиб руҳ моҳиятига айланади. Ҳислар бағридан ўсади Ватан деган юксаклик. Мушоҳадалар вазминлиги туйғулар түгёнига сингади, туйғулар түгёни мушоҳадалар вазминлигига кўчади.

Мурод — фикрлашга ундов. Ўйлашга ундов. Мушоҳадалар йўсини билан, туйғулар йўсини билан инсон дейилмиш “сир”ни англаш немуғдор мушкул эканлигини, уни ўз-ўзига қайрилиб қарашга, ўзини билишга ундаиди:

Мушқулотлар кўпdir дунёда,  
Еchar бир кун барин интиқ жон.  
Аммо, очун олдида мангу  
Жумбоқ бўлиб қолади инсон.

Минҳожиддин Мирзо битикларида яна бир сифат ҳурлик олами — руҳнинг поклиги ҳамда беғуборлигига ишора айлаш сирасида намоён бўлади.

Руҳимга пок маъволар керак.  
Бу — шоир руҳининг согинч тарзи.

Шеърият борлиқнинг гўзаллигига муносабат йўсинида кангулларда меҳр ва муҳаббат, оқибат ва эътиқод фазилатларини пайдо қиласди. Борлиқдан олинган таъсирлар ва муносабатлар орқали руҳиятга ишора айлади. Минҳожиддин Мирзо қизгалдоқ, яфроқ, баҳор, юлдуз, куз, чечак, ҳазон сингари табиат воситаларини юракнинг ташбеҳларига кўчирадики, булар аксарият такрорланиб келган ҳолида янги бир ҳис шаклига киради. Айниқса, қизгалдоқ сифатини шоир турфа ҳис моҳиятига йўгиради:


Кун нуридан ёришади жарликлар,  
Қизгалдоқлар юз очади шодланиб.

Шоирнинг канглу ана шундай умидлар билан ёруғ. Руҳи ана шундай ҳислар билан равшан. Висолдан ҳабардир бу умидлар. Дийдорга интизордир бу ҳислар.

**Икром ОТАМУРОД**

## ШЕБРИЯТ

*Назир қилдим дилимни  
Бу гўзал кошонага,  
Ер ўтиб қўйгум қадам  
Шу азиз остонаяга.*



# *ЎУЛЛАШ ПАЙТИ КЕЛДИ, БОҒЛАРИМ*

Сано айтиб келган гиёҳлар  
Эй, топталиб чўккан, тогларим.  
Энди қадни тиклангиз дейман,  
Гуллаш пайти келди, боғларим.



\* \* \*

Гиёҳлардан сўрдим сенинг таърифинг,  
Кийиклар кўзидан ўқидим достон.  
Юлдузлар қўшигин тинглаб уйғондим  
Бошимда термулиб ўтиради тонг.

Қуёш юрагимга сочди тафтини  
Шундан қалбим сени англади, сездим.  
Субҳидам очганда замин кафтини,  
Мен масрур кафтдаги жаннатни кездим.

Фурраклар теракда чалар чанқовуз,  
Кўрдим жаннатлардан хабар — гулларни.  
Замин улашарди ҳар мургак дилга  
Ҳумо нигоҳидан тушган нурларни.

Укамдай силадим яшил майсани  
Синглимдай сүйдим мен қизгалдоқларни.  
Отамдай чинорга қараб бўйладим,  
Меҳри bog онамдай кездим bogларни.

Тоғларинг кўнглимда тиклади гуур,  
Сувларинг қалбимнинг ювди зангини.  
Ҳатто чумолилар тилида шукур,  
Мен шундан англадим Ватан рангини...

## ВАТАН

Булбулга тикондин етса-да озор,  
Унга азиз эрур шу жой, шу гулзор.  
Юртим, булбулларинг нафасин туйдим,  
Ким Ватанга ёрдир, Ватан анга ёр,

Мұҳаббат — иймонли ҳар дил зиёси,  
Күнглимга ўт солса бир гул ҳаёси.  
Ёрдин диёримни ортиқ севмасам,  
Қуйсин мендай ошиқ икки дунёси.

Майли, bogларингда тер тұқай тинмай,  
Майли, яшай бир зум роҳат не билмай,  
Бошимдан зар тұқиб, тилло сочса-да,  
Ўзгага бир сиқим туфрогинг бермай.

Меҳринг — юрагимнинг нури, қүёши,  
Тегса малҳам дейман шу замин тоши.  
Майли гүжа бұлсın, майли у ёвғон,  
Мен учун энг тотли шу юртнинг оши.

Мардинг шод қаршилар, ҳар синов онни,  
Бир кун мендан сұрсанг, шу азиз жонни,  
Танимни калхатлар нимталасынлар,  
Магар баҳт демасам мен бу имконни.

Эркинг, мұҳаббатинг, дилга оқмаса,  
Сенинг қайгуларинг күнглим ёқмаса,  
Розимасман агар қўзим туғингни  
Қуръондай муқаддас билиб, боқмаса,

Сенга қўтарилса у қўллар синсин,  
Үндайин юракнинг дукури тинсин,  
Баҳорингни ҳеч вақт урмасин аёз,  
Сенга тушар қиоров қўзимга инсин.

Ёв келса камонинг ёйи бўлай ман,  
Белингга боғланган шойи бўлай ман,  
Пешонамга битмиш ёрлақаб тангirim,  
Фақат пешонамда сени кўрай ман!

\* \* \*

Юрт йўллари, муқаддас йўллар,  
Дўст ҳам ундан келган, ганим ҳам.  
Мадад сўраб чўзилган қўллар,  
Эриб оққан бамисоли шам.

Бу йўлларда ганим қаъридан  
Гиёҳлар ҳам саргайиб сўлган.  
Бу йўлларда қанча пок диллар,  
Орзуларин тупроққа кўмган.

Бу йўлларни супурмаган ел,  
Ўқсиб ўтган бу йўлдан баҳор.  
Ганимга сув тутгани учун,  
Ич-этин еб инграган анҳор.

Бу йўлларга бобом тўккан ёш,  
Мардлар қонга беланиб ўтган.  
Бу йўлларга сигмаган қуёш,  
Бахтлар гамга уланиб кетган.

Шукр дейман, энди бу йўллар,  
Юрагимга тулашиб кетмиш.  
Бу кунларни кўрмоқ ўзи баҳт,  
Занжирларнинг овози — ўтмиш!

Сано айтиб келган гиёҳлар.  
Эй, топталиб чўккан тогларим.  
Энди қадни тиклангиз дейман,  
Гуллаш пайти келди, боғларим.

Энди менинг қалбимда ҳам ой,  
Ҳисларимга тутади гуллар.  
Энди сиз ҳам озодсиз учинг,  
Юракларга қамалган нурлар...

## ХАЛҚ

Қачон халқ бўласан, эй сен оломон?

**Абдулла Орипов**

Юз ўттиз йил неча юрак ёниб ўтди,  
Жондан кечди, лек кишандан тониб ўтди,  
Туркистондай улуг Она ёниб ўтди,  
Озодликнингtotи нима билмади эл!

“Халқ денгиздир...” дея ўтди  
Чўлпонлар ҳам,  
Ёв қўлида сурув бўлди “чўпонлар” ҳам,  
Ганимларга қанча тўлаб, ўлпонлар ҳам,  
Озодликнингtotи нима билмади эл!

Ҳар қадамда қўлласа-да боболари,  
Ҳақ йўлига чорласа-да боболари,  
Бош бўлмади элга нафс гадолари,  
Озодликнингtotи нима билмади эл!

Уйгон деган огасини сотди ўзи,  
Қодирийдек огасини сотди ўзи,  
Қуллик ичра, қуллуқ бўлди айтар сўзи,  
Озодликнингtotи нима билмади эл!

Ҳалқ номидан ўйволдилар кўзларини,  
Олов ичра ёндиридилар сўзларини,  
Алангадан олиб қочиб ўзларини,  
Озодликнингtotи нима билмади эл!

Йиллар ўтди, бот-бот ёниб чироқлари,  
Озодлик деб ортганида фироқлари,

Оҳ чекканда Абдуллодай Широқлари,  
Озодликнинг тоти нима билмади эл!

Не деб исмин айттолмайин у замонни,  
Сўзни ўқлаб қўлга олди зўр камонни,  
Чорлади у халқ бўл, дея оломонни,  
Озодликнинг тоти нима билмади эл!

Йиллар ўтди...

Озодликнинг тотин билдик,  
Истиқлол не, истиқбол не тотин билдик,  
Ал-Фаргоний, Ал-Бухорий, Амир Темур,  
Юракдаги уйгоқ жоннинг зотин билдик.

Англаб етдик ожиз тутган надир жонни,  
Нима фарқи борки, халқдан оломонни:  
Бир мақсадда олга босган қадамлар — Халқ,  
Озодликни қўлдан бермас одамлар — Халқ!

\* \* \*

Ёрсизсан, деманг ҳаргиз,  
манга маҳрам-ёр Андижон,  
Қаён борсам кўнгил ичра,  
мен борман, бор Андижон.

Ки жонимни жононалар  
яғмойи давлат этса гар,  
Манга қайта ато қилғувчидир  
ул минг жон Андижон.

Баҳор айёмида бедор насими  
ҳиндни сўроғлар,  
Бобири афғон ичрадур,  
то маҳшар нолон Андижон.

Зулми дунё занжири  
боглагач ҳур дилларни ҳам

Раҳнамо йикчи эшонлар  
қуулликка исён Андижон.

Ҳилол қўқда ўқинч бирла  
сўйласа гар бағри дод,  
Кўз ёшидин томғучи оламга  
юз Чўлпон Андижон.

Гар Шер ўғли куйласа  
ҳар дилки гунча, гул очадир,  
Бўйлари олам юзини  
тутқуучи райҳон Андижон.

Таърифига сўз битарга  
Минҳожиддин Мирзоси бор,  
Бобурийлар бешиги денг  
билигувчи жаҳон Андижон.

## ҲАҚИҚАТ ЧЕЧАГИ

### Чўлпонни эслаб

Ҳақиқат йўллари эмасдир осон,  
Ҳақ қарор топаркан кураш бор жойда.  
Маъюслик чеҳрангга ярашмас инсон,  
Ўйларинг курашсиз эрса бефойда.

Эсладим бир зотни, ҳақпаратст ўқтам,  
Замоннинг залворин четга отди у  
Тобелик оғусин тотган дилни ҳам,  
Ўйготиб офтобдай эрта ботди у.

Ҳақиқат йўлида йиқилди ҳориб,  
Кўзлари сўнаркан жилмайиб кулди.  
Кун келиб минглаб дил чора ахтариб,  
Ўйгонди, демакки ўрнидан турди.

Аммо, у туролмас мангу тупроқнинг,  
Мунис ҳамдамига айланиб қолди.  
Чироги бўлди у яқин-йироқнинг,  
Дунёда ҳақпараст нигоҳи қолди.

Ҳақиқат, ҳақиқат-баҳор асли бу  
У ўша баҳор деб ахир яшарди.  
Баҳорнинг борлигин исботлаб воҳ у,  
Эрта юз кўрсатган гулга ўхшарди.

Илк чечак эди у аёзга рақиб.  
Бу зотлар дунёга яшиллик берур.  
Аёзлар қилмасин минг бора таъқиб,  
Баҳор — бу абадий ҳақиқат эрур.

\* \* \*

Қизғалдоқлар қироат қиласар —  
Қабристонда, ҳар бири қуёш.  
Ўтганларга шафоат тилар,  
Тебранади қизил дастор бош.

Ҳар бир гиёҳ айтар саловот,  
Турон замин — бу уйгоқ замин.  
— Юрт шавкатин қайтар ҳақ... дея,  
Пичирлайди тупроқлар: Омин...

\* \* \*

Меҳру-муҳаббатдан сўз очсалар гоҳ,  
Багри кенг қай юрт деб излаб қолсалар.  
Дунёни бир сирдан этмоқ — чун огоҳ,  
Кўнглимдан бир ғуур кўкка юксалар.

Қайдадир ўқидим, офтоб ҳам азал,  
Меҳрдан тафт олиб тураркан қалқмай.  
Ўзбегим меҳридай меҳр кўрмадим,  
Оламнинг қай бурчи, четига боқмай.

Тўғри, ҳар ким учун ўз эли буюк,  
Гоҳ ўзни санаб ҳам кўрдим бегона.  
Шунда ҳам англадим, ҳаммадан суюк  
Элим, сен дунёда меҳри ягона.

Қувват олар эмиш англадик қуёш,  
Меҳр бор эканки, у ҳам бор доим.  
Жаҳолат ҳукмига бош эгса бардош  
Шундан бошланмасми, қиёмат қойим?!

Ҳа, кўпdir дунёда меҳрли эллар,  
Бир оз муболага қилурман, балким,  
Дилдаги ул буюк меҳринг, сеҳринг-ла,  
Офтобга нур бериб турибсан, халқим!

\* \* \*

Булбулларнинг нафаси кўксимга урилади,  
Ялпизларнинг бўйидан маст бўламан девона.  
Жонсиз-гариб шохларда куртаклар тирилади,  
Сен бир ажиб оятсан борлиқ ичра ягона.

Қалдиргочлар-дарвешлар ҳамд айтади мадҳингга,  
Ҳар чечакнинг бошида фаришталар кезади.  
Ҳатто дунё нуридан баҳрасиз ожиз жон ҳам,  
Баҳор сенинг нафасинг юраги-ла сезади.

Қара, ҳатто қалб нима, эзгулик не унуглан,  
Кўнгил косалари ҳам нафс ўти-ла тўлганлар.  
Баҳор бунча соҳирсан, қара, бир зум тирилмиш,  
Бу дунёда нафс дея кўнгли эрта ўлганлар.

Оlam ҳар тонг мунаvvар, кўнгиллар шод, диллар шод;  
Дунёга кулиб боққан гунчалар шод, гуллар шод,  
Қаро зулмат чекинмиш булбуллар чаҳ-чаҳидан,  
Юлдузлари гуллаган ул соҳира тунлар шод.

Минг құллуқ деб түшалгум сабза қаби пойингга,  
Хар қалб сезар бу тонгда күклам нигоҳларини.  
Найсонлар фариштадай шивирлаб ювиб кетар,  
Аёзларга құл берган диллар гуноҳларини.

Яна умид гуллари яшнадилар оламда,  
Дүнёнинг чеҳраси ҳам бу кун гулдай очилмиш,  
Йил бўйи кўнгиллардан унутилган туйгулар,  
Қаҳраган бу дилларга уруг қаби сочилимиш.

Баҳор, кўнглим сеники, унга ишқ сол, олов сол,  
Кўнгилдан чиққан оҳлар капалакка айланар.  
Юрагимдан чекинган туйгуларим, ҳисларим,  
Қалбимнинг шохларида қуртак қаби жойланар.

Токи, улар очилсин, гулга кўмилсин жисмим,  
Кўзларимни тарқ этсин ғам биноси — ул соя.  
Кипригимдан ёшлармас, чучмомалар тўқилсин,  
Юрагим бир қизгалдоқ бўлса, менга кифоя.

## ТУНГИ ЎЙЛАР

Юлдузли тун, хаёл тулпори  
Олиб қочди дил чавандозин.  
Ҳайрат ила мозийга боқиб,  
Маҳзун диллар тингладим созин.

Кўз олдимда пирпираб турган,  
Шамлар юлдуз каби ёнарди.  
Кўҳна тарих воқеалари  
Кўзларимда ўтдай ёнарди.

Мўъжизалар жамланган олам,  
Шоширади ақлу-хаёлим.  
Миср эҳромларин қурдирган,  
Фиръавиллар олимми, золим?!

Бу дунёда энг оқил жонзот,  
Магар инсон бўлса-да, токим,  
Аммо нечун унинг кўнглида  
Жоҳилият абадий ҳоким?!

У қайники макон этса гар,  
Девор ичра сақлар жонини.  
Бир-биридан асралмоқ бўлар,  
Бир-бирининг тўкар қонини.

Ажаб, ўтмиш — фақат жанг-жадал  
Ҳануз тинмас шаҳидлар зори.  
Ёвузликдан сақланмоқ учун,  
Наҳот керак, Хитой девори?!

Лол этади, ақлим шошириб  
Ажаб, инсон ёвузлик қули.  
Таскин берган каби қаршимда,  
Очилар гоҳ эзгулик гули.

Абадият гулзорин кезиб,  
Кузга суртдим ажиб гавҳарни.  
Муҳаббатга таъриф изларкан,  
Учратдим мен Тож Маҳални!

Йўқ, нур ошно дейман инсонга,  
Хаёл менга тутмагил огу.  
У лойиқдир шундай бўстонга,  
Фикрлардан сачрайди ёғду.

Замин, маъво қаршида инсон,  
Асли кичик, ожиз бир зарра.  
Аммо унинг ёвуз қудрати,  
Тўфонлардан хавфли минг карра.

Инсон қалби эзгулик ичра  
Қанча юксак бўлса-да, лекин  
Гоҳо унинг жоҳил кўнглини,  
Қирғинларин кўрмассан, чекин.

Мушкулотлар кўпdir дунёда,  
Ечар бир кун барин интиқ жон.  
Аммо очун олдида мангу,  
Жумбоқ бўлиб қолади инсон!

\* \* \*

Согинаман, согинсам ҳам чидайман,  
Бир кун ўша ёруг кун ҳам келади.  
Йўлларимга юлдуз сочиб, овутиб,  
Кундан ойдин тун ҳам бир кун келади.

Бошим эгсам, йўл бўйида гиёҳлар,  
Шеър ўқийди, яхши кўрган шеъримни.  
Бойчечакка айланади у оҳлар,  
Кузга суртгум шеър айтгувчи еримни.

# **СОФИНЧ САЛТАНАТИ**

(туркумдан)

Қайга бормай, ёддан чиқмайди,  
Қайга бормай қалбдан ажралмас,  
Аждодларим қолдирган тортиқ.

Юрагимни тирмалар согинч,  
Қалбим интиқ, тuya бошлайман  
Кўкрагимда Бобурий оғриқ.

\* \* \*

Бобурингман, айрилган ул наҳру Андижонидин,  
Ашъорларим деманг сиёҳ, алар юрак қонимдин,  
Қайтолмасман Ҳинд мулкидин,  
кўзларимда ашқ қатор  
Топарму деб қийнар жоним  
алар менинг шонимдин.

Боролмасман Андижонга ганим тўғсан еримни  
О, Самарқанд, ўзинг чорла Ҳумоюним ўғлимни,  
Тангрим, сендан ёлгиз ўтинч,  
руҳим қилма дарбадар,  
Бобурийлар макон этсии ганим чиққан тўримни.  
Қўздан қолсам, сўздан қолсам  
ва лек ўлмагай согинч,

Бобур Мирзо юраги бу мангу зорланган нотинч,  
Ҳумоюним, сен Ватанга насиб этса, боролсанг  
Аввалида Қорадарё сувидин бир қултум ич!  
Шунда менинг руҳим бир зум ором олар, чирогим,  
Кўшким бўлур эди Ўшда асрар Барокӯҳ тогим,  
Туронимнинг тупрогига таъзим қилиб ерим ўп!  
Ўша ерга ҳоким кўмгил тикла Бобурий богим!  
Ҳолдан тойди Бобур Мирзо сўзларида дард тугал  
Сўздан қолди Бобур Мирзо кўзларида дард тугал,  
Қўздан қолди Бобур Мирзо юрагида дард тугал...  
Ҳолсиз қўлин кўкрагига босиб таслим этди жон  
Юрагида кетди уни ёри жони Андижон...

\* \* \*


Тўхтагил, ёшлигим,  
Бир зум шошмагил,  
Фурсат бер кўнглимнинг гулламогига.  
Ишончим бор ҳали дунёда яшнаб,  
Юрагим бир қўшиқ куйламогига.

Тўхтагил, ёшлигим,  
Бир зум шошмагил,  
Ҳали етганим йўқ умрим тахтига.  
Бир тола ёргулик, нур қўшолмадим,  
Зулматни тарқ этган элим баҳтига.

Тўхтагил, ёшлигим,  
Бир зум шошмагил,  
Куйлайин дугоҳу, сегоҳларимни.  
Бесамар ўтгандай энг гўзал даврим,  
Ювишга имкон бер гуноҳларимни.

Тўхтагил, ёшлигим,  
Бир зум шошмагил,  
Бу кўнгил ўксимай етсин ниятга.  
Фурсат бер, юрагим чўги ўчмасдан,  
Бир қўшиқ қолдирай абадиятга...

*МУҲАББАТ, ҚАРШИНГДА  
БУ ЖОНИМ НАДИР*

Муҳаббат, қаршингда бу жоним надир?  
Бир томчи ёшми у, кўзингдан оққан?  
Ашкларинг бунчалар бўлса беқадр,  
Нечун киприкларинг бу гулни таққан?!.  


\* \* \*

Дунёга боқдиму, ишондим энди,  
Армонсиз яшамас унда одамзот.  
Севгисиз ҳаётдан мен тондим энди,  
Тушимга киради севгилим бот-бот.

Мани зор йиглатиб йиглар ўзи ҳам,  
Кўз очиб кўрганим — у кўзларда нам.  
Гулларга боқдиму, дард ичра қолдим,  
Япроқлар юзида мунчоқдек шабнам.

Сен нечун йиглайсан, сен нечун гулим,  
Нечун, кўз ёш сендай гулгун зиёда.  
Бир дилни ахтариб ўтмоқда умрим,  
Маним йиглаганим камми дунёда?!

## БАҲОР БЎЛИБ КЕЛ

Сабзаларга буркаб кўнглим диёрини,  
Умидим гуничаси кулса, сўлмасмиди?  
Ким кутибди ахир мендек ўз ёрини,  
Мажнун бўлсам, Лайло ҳолим билмасмиди?  
Баҳор келган йўл сенга ҳам йўлмасмиди  
Баҳор билан келаверсанг бўлмасмиди?

Кўзларимда кулармиди қизғалдоқлар,  
Туярмидим турфа гулларнинг тотини?  
Сен билмадинг муҳаббатим ўша чоғлар,  
Боғлаб кетдинг юрагимнинг қанотини.  
Балким, кўнглим бунча ғамга тўлмасмиди,  
Баҳор билан келаверсанг бўлмасмиди?!

Билардинг-ку мен умримни сенга бериб,  
Бир қизғалдоқ умрин сендан тилаганим.  
Нима кўрдим бу дунёга шошиб келиб,  
Шу бўлдими ахир сендан сўраганим.  
Ой бўлмассанг кўзим кўкка тушмасмиди,  
Баҳор билан келаверсанг бўлмасмиди?!

Бу девона ким бўлди деб ўтар сабо,  
Бунча забун, бунча гамли қуйинг дейди.  
Қўп гам чекма, умринг ўзинг қилгунг адо,  
Хазон қиласар сени тушкин ўйинг дейди.  
Хазон нима балким, умрим билмасмиди,  
Баҳор билан келаверсанг бўлмасмиди?!

Менман, ўша, бир булбулдай баҳор чорлаб,  
Ҳар сония йўлларингда кутаётган.  
Менман ўша, ўша осмон бағрин догоғлаб  
Сени дея бир юлдузиз ўтаётган.  
Зулмат қучган осмон нурга тўлмасмиди,  
Баҳор билан келаверсанг бўлмасмиди.

Қайтмасингга ишонсам ҳам кутавергум,  
Нетай, ўзни ҳеч бу қўлга ололмайман.  
Билганим дард, ҳаёт гамин ютавергум,  
Хазон босган бу йўлларда қололмайман.  
Мен интизор кутган онлар шулмасмиди,  
Баҳор билан келаверсанг бўлмасмиди?!

Баҳор бўлиб келаверсанг бўлмасмиди...

\* \* \*

Муҳаббат йўл эди,  
Йўл эди билсанг!  
Шу йўлни кўрдингу кета олмадинг.  
Бўларди бир қадам сен юриб кўрсанг,  
Эй кўнгил, бормадинг, нега бормадинг?

Кўрдинг,  
У йўлда муnis қизғалдоқ,  
Сени чорлар эди, бағри қон эди,  
Билмадинг, сен қадрин ўша лаҳзани,  
Бу сенга аталган ширин он эди.

Билардинг,  
Усиз ҳеч яшай олмаймиз,  
Билардиң усиз биз тошмиз-бир харсанг,  
Бўларди-ку ахир, имкон бор эди  
Ортидан эй қуёш, тўхта, деб борсанг.

Сен ўша кезларда ўзингдан кетдинг,  
Сен ўша кезларда баҳт не билмадинг,  
Қаршингда эди-ку,  
Муҳаббат йўли!  
Сен кибор, нечун у йўлга юрмадинг?

Баҳт бизни биларди,  
Унутмаганди.  
Баҳт бизни атайлаб кутиб турарди.  
Гоҳо мен англардим, ялинган мисол,  
Ортимииздан гуллар сочиб юрарди.

Оҳудек қаршимда жилваланган дил,  
Неча бор кўзимдан излади зиё.  
Ёлвориб бўзлади сўзлай деб бу тил,  
Бўлмоқчи эдинг-му, қуёшсиз дунё?

Имиллаб ўтарди кунлар ҳам атай,  
Офтобнинг тафтини сезмадинг, дилим.  
Энди мен... энди мен... қандай овутай,  
Мендан воз кечганча кетаётган умрим?!

Багишлай олмадинг унга ўзингни,  
Багишлай олмадинг унга юрагинг.  
У йиглаб кетганда, муҳаббат йўли-  
Чорлади, келмади унга қарагинг.

Энди тун жодуси мени азоблар,  
Ҳижронлар оғуси томар кўзимга.  
Муҳаббат нелигин тушунмай ўтган,  
Мен раҳм қилмайман энди ўзимга,  
Мен раҳм қилмайман кибор кўнглимга...

\* \* \*

Ёмгир ёгар гунчаларга томчилаб,  
Шамол эсар юрагимни қамчилаб,  
Ҳеч ким келмас менга саодат тилаб,  
Сени кутдим мен интизор нечалар,  
Хазин бўлди бу ёмгирили кечалар.

Ташқарида қалтираган япроқлар,  
Юрагимга солиб кетар титроқлар,  
Ёритолмас кўнглим ёнган чақмоқлар,  
Сени кутдим мен интизор нечалар,  
Хазин бўлди бу ёмгирили кечалар.

Деразадан кўз ташладим жон ҳалак,  
Учолмасди, қаноти ҳўл капалак,  
Уни кўриб баттар эзилди юрак,  
Сени кутдим мен интизор нечалар,  
Хазин бўлди бу ёмгирили кечалар.

Узун бўлди бу ёмгирили кечалар...

\* \* \*

Қанча кутган эдим бу учрашувни,  
Қанча илтижолар қилиб тунлари.  
Сабрим ниҳолининг гуллашин кутиб,  
Ўтди ёшлигимнинг азиз кунлари.

Ўйчан кўзларимга тикиласан жим,  
Маъюс қорачигда ғамни кўрасан.  
Менга талпинасан, мен сенсиз ҳеч ким,  
О, демак баҳорим, мени севасан.

Шу бахтнинг ўзи ҳам менга кифоя,  
Шу лаҳза қувончи минг йилга етар.  
Эй ҳаёт, бас энди олгил ҳижронинг,  
Изтироб, юзимдан пардангни кўтар.

Боладек йиглагим келар шу тобда,  
Қайтдими, йўқотган азиз онларим.  
Мен сизни севардим, топиб бердингиз,  
Мен сизга ишонган эдим тонгларим.

Ох, фурсат, қанчалар тез ўтасан сен,  
Наҳотки кетар у яна минг йиллар.  
Ортингдан боқаман бир сўз деёлмай,  
Мен билан қўшилиб ёшлигим йиглар.

\* \* \*

Эй дил, баҳор билан юзлашдинг ёндинг,  
Уйгонди қизгалдоқ бўйли хотирот.  
Яна эртакларга чин деб ишондинг,  
Согинч куртакларинг гуллатди ҳаёт.

Сабзалар ичида қизгалдоқ-қуёш,  
Ёдингда тикланди ўтли чоғларинг.  
Кипригингда гунча-бир томчи кўз ёш,  
Багрига чорлади зангор боғларинг.

Бинафшалар кулди, кулгуси согинч,  
Дарёга талпинди дийдор излаб қор.  
Нурли қадамларин қўйиб ошиқди,  
Согинч гулларини сочганча баҳор.

Боғларда бодроқдай очилди согинч  
Қайтди қучогингга қалдиргочлар ҳам.  
Булутлар сув сепди: эй ташна дил, ич,  
Кўклам, согинганинг қайтадиган дам.

Лекин ҳар баҳор ҳам қисмат гулининг,  
Сен учун ифори ўқинч, аламли.  
Қудрати етмайди қадр тунининг  
Сабзадай киприклар шабнамли, намли.

Дилим, фурсат етди, келар қошингга,  
Эҳ, бунча азобга дучор бўлмасанг.  
Дунё гарқ бўлар-ку тўкар ёшингта,  
Келса-ю, кўзида согинч кўрмасанг,

Қани энди, ихтиёр сенда бўлса-ю,  
Сени севмаганни сен ҳам севмасанг...

## ҚАЛБИМ МЕҲМОНИ

Юрак замин эди, юрак ер эди,  
Унга лоқайд осмон тўкарди қорлар.  
Бунда ҳеч чечаклар ўсмас, дер эди,  
Ёт дерди, муҳаббат отли баҳорлар.

Юрак — ёғду билмас зимистон эди,  
Билмасди, недир шамс, ҳилол, юлдузлар.  
Шу сабаб ютгани фақат қон эди,  
Фарқсиз эди унга кеча-кундузлар.

Бир кун қор кўрпасин найзалааб чиқди,  
Афсунгар, оловтафт сирли бир чечак,  
Унинг ёғдулари хўп бисёр эди,  
Бой эди шу қадар, бой эди чечак.

Эриди борлигин қоплаган қорлар,  
Юрак заминида ажиб уйғониш.  
Талаб водийсида энди ҳар саҳар,  
Бир булбул тинмайин қиласи хонин.

Ёнади юрак-қалб, атроф чаманзор,  
Юлдузлар шам ёқди зулмат осмонгага.  
Баҳорлар қизгалдоқ, гулларин сочди  
Муҳаббат поёндоз солди бу жонга.

Энди тунлар юрак ҳилолга боқиб,  
Бир қўшиқ куйлади то тонгга қадар.  
Юракни уйготмоқ қанчалар ажиб,  
Юракни эритмоқ тотли нақадар.

Энди у куйлади ёниб ўртаниб,  
Бир чечак ҳақида-бир гул ҳақида.  
Мен эртак ёзаман унга ишониб,  
Юракда хўрсинган булбул ҳақида...

## ҚИШ ЭРТАГИ

Оппоқ, ҳарир эди борлигинг  
Ойдин эдинг-тўлин ой эдинг.  
Кўзларимдан қочирганимда  
Хаёлимга сен кириб келдинг.

Оппоқ-оппоқ орзуларимга  
Қиё боқмай кулган чечагим.  
Сендан айро тушгандан буён,  
Юлдузларга айтгум эртагим.

Азоб билан оқарар тонглар,  
Тунлар узун-дилда қийноқлар.  
Мен ҳам энди севгисиз қолдим,  
Англаб етдим, сизни уйгоқлар.

Киш ҳам кирди, аёз кун бўйи  
Ҳасратимдай ёғаверди қор.  
Ушалмади куртаклар ўйи  
Йироқлашиб кетганди баҳор.

Чор атроф қор, гўё сен келдинг,  
Ўша ойдин кўйлакда ёниб.  
Ташқарига югуриб чиқдим,  
Хаёлимга ўзим ишониб.

Йўқ, сен йўқсан, умидвор кутдим,  
Зулмат яна келди сўроқлаб.  
Юрагимга таскинлар айтдим  
Келаётган азобга чоғлаб.

Йўқ, негадир ҳоргин кўзларим  
Юмиларкан аста илгадим...  
Деразага боққанча сахар  
Бир тўп гулни кўриб йигладим...

## ОРЗУДАГИ МУҲАББАТ ҲАҚИДА ҚЎШИҚ

Дилимда яшардинг, муҳаббат,  
Мен буни билардим, билардим.  
Маргилон қайда лек билмасам ҳам,  
Отабек мисоли юрардим.

Ишонар эдим, мен бир куни,  
Маргилон боришим — севишим...  
Ўшанда сувгами чиқар... деб,  
Мен қанча кутганим — Кумушим...

Хаёлан гоҳ кулиб, гоҳ сўлиб,  
Маргилон томонга тортар жон.  
Юлдузлар пойида ўлтириб  
Эртаклар айтганда Андижон.

... Улгайдим, ҳаёт не билдим, мен,  
Умидлар ёр бўлди йўлимда.  
Маргилон қайда деб изладим.  
Севгилим — Кумушим кўнглимда.

Сўнг бир кун... ўкириб йигладим,  
Маргилон йўлидан қайтаркан.  
Шамоллар рўмолча тутдилар,  
Кўнглимга таскинлар айтаркан.

Маргилон, Маргилон топиб бер,  
Топиб бер, севгилим-Кумушим...  
...Мен билган Маргилон йўқ әкан,  
Наҳотки, Зайнабни севишим?!

Йўқ, йўқ, кўксимда бир олам-  
Мен ўша диёрдан келмасман.  
Эй ҳаёт, қўй мени, қийнама,  
Севгимни ўзгага бермасман.

Мен билган Маргилон кўксимда,  
Кўксимда мен билган Кумушим...  
Зайнабим бўлса ҳам ёнимда,  
Қўймасман мен уни севишим...

Кумушим, мен билан Кумушим!  
Кумушим, мен билан Кумушим!

## ТАСКИН

**Дўстим И...га**

Телба кўнглимизга ишқ бўлиб меҳмон,  
Гуллар ичидаги раъносин севдик.  
Мажнун руҳимизга Лайло келган дам  
Кўз очиб бир ажиб дунёга келдик.  
Хаста қалбимизга қулоқ солган он,  
Хаёллар бошлади бизни малакка.  
Ул Мажнун бизчалик севмаган, инон,  
Биз ошиқ ўлдик ул-ёри фалакка.  
Унутиб бўларми ўша кунларни,  
Юракка бахшида қилиб минг қанот,  
Ёритиб bemажол қаро тунларни,  
Бир ширин ҳасратлар қиласдик бот-бот.  
Севгимиз тасодиф эмасди билсанг,  
Ёшликнинг беҳуда дами ўтганди.  
Жилмайиб хушлашган у она баҳор,

Бизларга бу ҳисни ташлаб кетганди.  
Гоҳ англай олмасдик девона дилни,  
Оlamни бир гул деб севиб қучардик.  
Асрардик юракка қўнгган булбулни,  
Ҳар қалай ердамас кўкда учардик.  
Оқшом юлдузлардан аввалда шошиб,  
Севги осмонига чиқиб олардик.  
Дилимиз қай дилга кетган туташиб  
Шундай эртанги кун томон борардик.  
Гамгин келажакдан бехабар эдик,  
Айрилдик бир кун у эҳтирослардан.  
Кўплардай бизлар ҳам тақдирга йўйдик,  
Юракка малҳамлар бўлди дўстлардан.  
Қўй, дўстим, ўкинма, ўкинмоқ ёмон,  
Ҳар тугул дунёга бевақт келмадик.  
Ҳаёт шу экан-да, кўп-да беомон,  
Ҳар қалай севсак ҳам ёмон севмадик...

## ШИВИРЛАМА, ШАББОДА

Шивирлама, хаёлим бўлиб,  
Лабларимга томизма бода.  
Жоним ҳозир кетар тўклилиб,  
Шивирлама менга, шаббода.

Нафасингга ўхшатдим жуда,  
Менга азиз бўлган нафасга.  
Қўй, жонимни учирворасан,  
Зўрга солдим ўзи қафасга.

Шивирлама, менга шаббода...

\* \* \*

Бахт, чорлайсан, лек келгувчи гам кўп экан,  
Кекса дунё сабр дейди, кутаркансан.

Бу оламда адашган бир йўловчидек,  
Севсанг, фақат хаёл билан ўтаркансан.

Бу очунда гуллаш нима, унуди дил,  
Кўп согиндим гунчаларнинг кулгусини.  
Кечам — согинч, бугун, ҳатто эртам — согинч,  
Эшитаман ёлгиз ялпиз йигисини.

Гиёҳ унмас кўнгилдаги тоғларимда,  
Тафти йўқдур кўзимдаги қуёшнимнинг.  
Булбуллар чаҳ-чаҳламас дил боғларимда  
Кўкламлари унут бўлган бардошимнинг.

Мажруҳ кўнгил — гўё яшин урган дараҳт  
Танасида чумоли дард ўрмалайди.  
Фам лашкари әрур гўё кеча-кундуз  
Адо бўлган бу вужудни пармалайди.

Эй дарвеш ел, ҳолинг не деб сўрмадинг - а,  
Ўлан айтган тўргайлар, жим хўрсинасиз.  
Юракдаги чечакларим, ялпизларим,  
Ўн йилдирки, нечун мендан беркинасиз.

Бинафша дил ифорлари учиб кетар,  
Юракдаги яшилликни кўмади қор.  
Ўн йилдирки, ҳануз қайда билолмайман  
Вужудимга титроқ солган ўша баҳор.

Дунё мендан юз ўғирди, гариб кўнгил  
Қайда баҳор, мени олиб кетмайдими?  
Ахир, усиз қанча яшаб қўйдим, мана,  
Шунча тортган азобларим етмайдими?

Бир дам ёдга олмади-я мени дунё,  
Бир умидим сақлаган дил тунрогидир.  
Хазон бўлиб яшадим мен ўн йил гўё  
Шу бир умид-вужудимнинг титрогидир-  
Юрагимнинг сўнгги яшил япрогидир...

\* \* \*

Сендан қолди юрагимда ширин ўйлар,  
Фаришталар ичра топиб синганим.  
Ёдга олсам юрагимда атрий бўйлар,  
Қайлардасан, кўнглим чорлаб соғинганим.

Энди сени хаёлимда суяман мен,  
Ширин-ширин хаёл билан ўтар ойлар.  
Хаёлларнинг кулбасини ташлаб чиқсан  
Остонадан ўтолмайман, азоб пойлар.

Яхшиямки, ажиб-ажиб хаёллар бор,  
Соғинчлар гоҳ найсон янглиг кўзим намлар.  
Ширин-ширин хаёл таскин берар, аммо  
Хаёлдан-да ширин эди ўтган дамлар...

\* \* \*

Бунчалар девона, телбасан кўнгил,  
Жунунлик сени ҳам этмиш баҳтиёр.  
Ўйларинг юлдуздай ёрқин, нурафшон,  
Ул ойга кетдими энди ихтиёр.

Бунчалар девона, телбасан, кўнгил,  
Хаёллар қўйнида кезасан саркаш.  
Қанчалар шириндир, қанчалар тотли  
Сени соғинганни соғиниб яшаш...

\* \* \*

Муҳаббат, қаршингда бу жоним надир  
Бир томчи ёшли у, кўзингдан оққан?  
Ашқларинг бунчалар бўлса беқадр,  
Нечун киприкларинг бу гулни таққан?!

Билмадим, мунаvvар офтобмикин жон,  
Зулматлар кетгунча қиласми сабр?  
Багринг лоласидан томганми бу қон,  
Муҳаббат, билмасман бу жоним надир?!

\* \* \*

Тотли эди бир вақтлар дунё,  
Ташвишлар ҳам бу дилдан йироқ.  
Чорлар эди мени бир зиё,  
Етолмадим нурига бироқ.

Кўнглим кезган баҳорий йўллар,  
Чечаклари мени биларди.  
Субҳидамда у майин қўллар-  
Шаббодалар сочим силарди.

Инсон умри гоҳ ҳуд, гоҳ беҳуд,  
Ёруғлигу тун-ла ўтаркан.  
Муҳаббат ҳам баҳорий турна,  
Хазонрезни сезса, кетаркан.

Умрим баҳорларин қўмсаб гоҳ,  
Юрак ол, деб қизгалдоқ тутар.  
Согинчидан этгали огоҳ,  
Киприкларда куртаклар битар,

## *АНДИЖОН, БУ — СИЗСИЗ ОНАЖОН*

Сиз ҳар тонгда кутасиз мени,  
Ҳар субҳидам кутар Андижон.  
Соғинмасдан қандай яшадим,  
Андижон бу — сизсиз, Онажон!



# СИЗГА БАФИШЛАЙМАН ТОПГАН ҚАДРИМНИ

## I

Умр карвонида мен ҳам йўлчиман,  
Гоҳо гам шарпасин солар юзимга.  
Ҳасратли кўнгилга умид-элчиман,  
Офтобдан бир тола яшар кўзимда.

Йиллар ва йўлларда ўтар ҳаётим,  
Катта йўл чорлади кўнглимни яна.  
Мадорсиз қолмагай учар қанотим  
Ёнимда, қалбимда бўлсангиз Она.

Сиз Ҳақни суйган бир муслима кўнгил,  
Кўксимга қадаган гулингиз-юрак.  
Сизга осмон ака, юлдузлар сингил,  
Менга бу маъводан ўзга не керак.

## II

Яшамоқ не ўзи, муваққат имкон,  
Дунё-чи, дунё бу кўҳна ғамхона.  
Мен қайдা бўлмайин қалб менга макон,  
Шу маконда сизни асрайман Она.

Сиз кўрган куртаклар гул бўлди бу кун,  
Мехримни нон каби улашдим элга.  
Гоҳо фигонимдан чиқса-да тутун,  
Бобом деб дардимни айтаман ерга.

Сиз дилга ёққан у әзгу чироқни,  
Нафс—шамол ўчирмоқ бўлса дафъатан.  
Ёдлайман кўнгилда уйгоқ Широқни,  
Энг тоза ҳисларга бу дилим Ватан.

Шайтоний ҳавасдан музaffer бўлиб,  
Мен тугдай кўтаргум гулдай сабримни.  
Шукримни, меҳримни поёндоз қилиб,  
Сизга бафишлайман топган қадримни.

\* \* \*

Офтоб мисли доя момодек,  
Дараҳтларга куч-қувват тилар,  
Куртакларнинг йўргаги ичра,  
Капалакдек гунчалар кулар.

Ўйларканман шуларни доим,  
Тилимга сўз келади қатор:  
«Бу дунёни давомли этган  
Оналарга ўхшаркан баҳор!»

## ТАҚДИР ЙЎЛИ

... Андижонда туғилган жойим,  
Чорласа-да боролмадим ҳеч.  
Ёдин солмиш дилга худойим,  
Тилдан қўймам уни эрта-кеч.

Умр йўли мени шу томон,  
Олиб келган бўлса нетайин.  
Асли шундай яралган замон,  
Ҳукмин бузиб қайга кетайин.

Тақдир деган тогли довон бор,  
Ўтмоқ мушқул посбонларидан.  
Қанча сирдош юлдузлар топдим  
Кўҳна Шошнинг осмонларидан.

Гоҳо юрак топганда озор,  
Гоҳ кимдандир етганда алам.  
Қўнглимга нур солади такрор,  
Сирдош дўстга ўхшайди қалам.

Тақдир йўли харитада йўқ,  
Согинчларни билмас посбони.  
Инсон қайга борса туташган  
Ўз юртига минг битта жони.

Қизгалдоқлар нигоҳи тушган  
Ерларимни ўпгим келади.  
Бобур Мирзо ета олмаган  
Андижонга кетгим келади.

Кетолмайман сенга, Андижон,  
Етолмайман сенга, Андижон.

## АНДИЖОН, БУ – СИЗСИЗ ОНАЖОН

Дарахт тўкар япроқларини  
Йўқ, тўкмайди, шамол тортқилар.  
Билмам, шу кез маъюс дарахтнинг  
Танасида недир зирқирап?!  
Гариб мисол танҳо у шохлар  
Эслаб ҳар тонг япроқларини.  
Шамолларга инсоф тилайди,  
Яшиrolмай титроқларини.  
Ҳасрат билан кўкка кўз тикар,  
Алвидо дер хазон барглари.  
Ҳар кузакда қайта бошланар,  
Унutilган унинг дардлари.  
Шамол эсар, тўзғир хазонлар,  
Тақдир-қуюн, қиласр чирпирак.  
Шу ўйларни битаркан ногоҳ,  
Санчиб-санчиб оғриди юрак.  
Азим дарахт япроги харчанд  
Интилса-да қайтолмас унга.  
Онам-дарахт, мен-чи, баргмасман,  
Нима бўлди, дўстларим менга?!  
Тугамас-ку, ахир юмушлар,  
Дўст бўлдими, менга баҳона?!  
Ахир, имкон ҳар вақт топилар,  
Фарзандман, деб юрибман яна...  
Гарчи қуюн, турса-да довул,

Гарчи йў<sup>ли</sup>м тўсса қум-бўрон.  
Агар йўл<sup>га</sup> отланар бўлсан  
Ҳатто ти<sup>на</sup>р ёгаётган қор.  
Сиз ҳар тонгда кутасиз мени,  
Ҳар субҳидам кутар Андижон.  
Соғинмас<sup>дан</sup> қандай яшадим,  
Андижон<sup>бу</sup> — сизсиз, Онажон?!  
Соғинч била<sup>ни</sup> довон ортида  
Эслаб ме<sup>н</sup>дек «япроқ»ларини.  
«Болажо<sup>ни</sup>м сөғмикин?» дея,  
Сездирма<sup>йди</sup> титроқларини.  
Отланам<sup>ан</sup>, қўзда ёш билан,  
Келдим.. келдим, йўқ энди фироқ.  
Онам соч<sup>им</sup> силаб эркалар,  
Тиззасид<sup>а</sup> ям-яшил япроқ...

\* \* \*

Омонатду<sup>г</sup>а берилган имкон,  
Вақт кути<sup>п</sup> турмайди жасоратимни.  
Ёшлик — лаҳза янглиг берилган бир он,  
Эртага қай<sup>тарг</sup>ум омонатимни.

Дилимда титра<sup>г</sup>ан ҳақиқатни мен,  
Ҳаёт дарё<sup>ига</sup> юборай қўйиб.  
Кўзларим мухъаббат кўрсатган ҳурнинг,  
Пола руҳс<sup>орига</sup> олсинлар тўйиб.

Омонат лаҳзалар эрта жонимни,  
Қизгалдоқ ости<sup>га</sup> кўмар бегумон.  
Бир лаҳза жис<sup>мим</sup>да чўзилган умр,  
Шошилии<sup>нел</sup>игини билмайсан ҳамон.

Жисмимд<sup>в</sup>идам берган омонат,—  
Бир дунё<sup>уйгу</sup>лар навбатин кутар.  
Одамлар<sup>и</sup> алб<sup>ига</sup> улашай барин,  
Кечиксам<sup>бу</sup> дунё мени унутар.

Ҳақиқат ҳиссини сочай дунёга,  
У маглуб дилларга бир нигоҳ солсин.  
Чулгансин қуёшдай нурли зиёга,  
У мангу оламда ҳукмрон қолсин.

## АЁЛ

Аёллар — дунёнинг ҳаётбахш кучи,  
Ҳар қалбда бир қуёш, ҳар қалбда зиё.  
Онада тириклик бурчи ва юки,  
Бешикдан бошлангай асли бу дунё.

У мунис волида жумла башарга,  
Қуръондай муқаддас Она-бу калом.  
Ҳар тонгда юз очган нажот-қуёшдай,  
Унга пайгамбарлар бергандур салом.

У — меҳр тимсоли, бинафша — баҳор,  
Яшиликсиз олам яшави душвор.  
Бир мургак юракка чечак эккан чог,  
Азиз боши узра учқунлайди қор.

Нон тепган кўр бўлур, дейди донолар,  
Ҳар ҳикмат маъноси бу — бир оқибат.  
Аёлни хўрлаган хўрланар бир кун,  
Саодат улашган баҳт топар албат.

Эъзозланг, эъзозланг, уни эъзозланг,  
Мунис юрагидан тўкилмасин оҳ.  
Нафақат хўрламоқ — зулм, ҳаттоки,  
Аёлни гул билан урмоқ ҳам гуноҳ.

Гарчи иродаси метин тоғ-қоя,  
Аммо у бир гулдир, муҳтоҷ паноҳга.  
Аёлни қанчалар баҳтиёр этган,  
Шунча яқинлашар, ахир Оллоҳга...

# ХАЁЛИ СОГИНЧЛАР

Шоира Зулфияга

Дардли дунё әкан бу дунё,  
Бедард әмас шундан одамзот.  
Шеър олами-кўрдим бир зиё,  
Гамлар уни қилмади озод.

Бахтим қаро демади у ҳеч,  
Сабр бўлди унга дугона.  
Изтиробнинг яшил тахтида  
Бир аёл бор мангу ягона.

Баҳор илк бор қайга келади,  
Кулиб боқар гунчалар кимга?  
Баҳор илк бор унга келади,  
Согинчини бермас ҳеч кимга!

Гуллар дуо қиласар ҳар саҳар,  
Садоқатнинг фариштасига.  
Муҳаббат ҳам аста бош қўяр,  
Қуллуқ, дея бу бекасига.

Садоқат бор қадрим улуг дер,  
Садоқат бор, меҳр менга ёр.  
Шу аёлга бардош қуллуг дер,  
Муҳаббати чексиз улугвор.

Шулар асрар уни дунёда  
Маҳзун мангу суради хаёл.  
Согинчлари ҳануз ҳаёда,  
Бардош маъбудаси асли бу аёл...

1986й

\* \* \*

Бугун тушларимга кирибсиз Она,  
Дардимдан хабардор экансиз-ку, оҳ.  
Мен сиздан яширдим ташвишим яна,  
Сиздан сир яширдим, бу ҳам бир гуноҳ.

Лочин юрагимга қўнмиш қузгунлар,  
Орт сари бурмоқчи бўлди йўлимни.  
Она, мен баландроқ кўтарсам дейман,  
Баҳорий гул тутган новда — қўлимни.

Сўзларим тинглаб сиз, дедингиз болам,  
Кўнглингни кенг қил, лек қайтма йўлингдан.  
Онага ўхшайди, волида-олам,  
Мададга зор бўлсанг, тортар қўлингдан.

Азият бермай деб айтмадим у кун,  
Бошимда ўйнарди ғамлар бўрони.  
Бугун ҳам туйдим кўп меҳрингиз кучин,  
Оналар офтоби экан дунёни.

Уйгондим руҳимда илоҳий қудрат,  
Юрагим яшашга чорлаб урап бонг.  
Сафдошим, дилимда мавж урган шиддат,  
Менинг кўзларимда кула бошлар тонг.

\* \* \*

Ёлғизлиқдан эзилар кўнгил,  
Ҳамдамларнинг кўпи риёкор.  
Ёдга олсам тортаман енгил,  
Мажруҳ дилга фақат худо ёр.

Гиёҳларнинг шивирин тинглаб,  
Қизгалдоқдан сўрайман сабр.  
Наҳот минглаб дилларда риё  
Садоқатлар кўмилган қабр.

Эй, саболар ҳамдамим бўлинг,  
Фариштадай алқайин сизни.  
Сен бағрингга олақол осмон,  
Юрагимдан учган юлдузни.

Бир осмон деб эзилар кўнгил,  
Руҳимга пок маъволар керак.  
Тун ила тонг оралигида  
Бир олам деб талпинар юрак.

\* \* \*

Яна янги йил келмоқда, чор атроф оппоқ  
Оппоқ сочли дараҳтларга боқаман маҳзун.  
Эй дўстгинам, кулгумгамас, сен кўнглумга боқ,  
Юрагимга бошин қўйиб йигламоқда тун.

Гарчи лабда ўйнаса-да бир зум табассум  
Қувонч нури кўринмайди асло кўзимда.  
Юрагимга кириб йиглаб оламан бир зум,  
Аввалги чўғ сезилмайди ҳазин сўзимда.

Яна бир йил ўтди, ёшим улгайди, ўсдим  
Ичга ютиб яшаяпман согинч, ноламни.  
Аммо ёлғиз кезларимда қон ютгум, дўстим,  
Ахир бу йил олиб кетди мендан Онамни.

Қизларимнинг қош-кўзидан излайман Онам,  
Эркалаши, кулгусидан излайман Онам,  
Улар менинг бу дунёда қолар изларим  
Онам яшар юзларида-Она қизларим!

Шу сўзлардан юпанч излаб согинч гулига,  
Янги йилга куч топаман қўймоққа қадам.  
Юрагимни тўлдираман ҳаёт нурига,  
Зеро, таскин билан тирик дунёда одам.

## *ДИЛИМ ҚҰЁШИДАН ЁРИШСИН ЙОЗИМ*

Дилим қуёшидан ёришсин юзим,  
Үзимники бұлсин кулгум, ҳам бұзим.  
Рұхимга бегона ҳисга талпинма  
Қалбимдан хабар бер, қалбимдан сұзим.



\* \* \*

Шеър ўзи нимадир, ишқий калима,  
Ойдин булоқ гули — шаффоф бир туйгу!  
Ё, кўнгил йигиси, шуур гавҳари,  
Ё, ҳайрат, ё ҳасрат, энг ширин қайғу!

Шеър нима, пайконми, руҳга санчилган,  
Ёки, қалб дарахтин сирли япроги.  
Балки, нилуфардир дилда очилган,  
Кўнгилда улгайган Мажнун титроги?

Шеър нима, дардми у, ё зикр ажиб,  
«Аналҳақ» деган ул кўнгилнинг охи.  
Дилдаги жаннатми, боғлари нажиб,  
Қайда у руҳдаги дарвеш даргоҳи?

Шеър нима, тилсимли зулмат вужуднинг,  
Қаъридан ой каби чиққан ифода.  
Кўнгил тогларига қўнгган бургутнинг,  
Ўтли нигоҳидан тўкилган бода?

Англамоқ кўйида дил сўйлар тошиб,  
Чин шеърки, бир қақнус - дилга раводир.  
У — мужда — етти қат осмондан ошиб,  
Ҳақдин келаётган тоза ҳаводир...

\* \* \*

Сендан нени кутиб яшайман,  
Гоҳо англаб етолмам ўзим.  
Юрак уйғоқ, журъатга шайман,  
Фақат сени излайди кўзим.

Биламан, сен баридан огоҳ,  
Дилим сенинг қўлингда гунча.  
Эй, соҳиби руҳим, сабр бер,  
У боғингда очилгунича!

Лабларимда исминг — капалак,  
Кўзимдаги гулларим - сиёҳ.  
Бағримдаги ўксик жон ҳалак,  
Вужудимда гунчалайди оҳ.

Мени огоҳ этар бир овоз,  
Иймон гули, инграган чоғлар.  
Ҳар сўзингни ўзи жойнамоз,  
Нафасингдан келар баҳорлар...  
Юрагимга кирап баҳорлар...

\* \* \*

Бошим қуийи эгдим майса ҳамдард бўлди,  
Капалаклар юзларимни силаб ўтди.  
Ёлғиз жоним бу дунёning меҳробидан,  
Муҳаббатдан бир кун висол тилаб ўтди.

Туроб ичра мен жисмимдан айрилдим-ку,  
Керак эмас қизгалдоғи мозоримга.  
Бу дунёдан ўзгасига қайрилдим-ку,  
На қилгандим ўша дили озоримга.

Юрак уммон ичра қолган япроқ мисол,  
Титраб-титраб сўнгги сўзин айта бошлар.  
Бизни кутиб муҳаббат ҳам у мозорга,  
Бошимиздан тупроқ сочиб қайта бошлар.

Юз йил ўтар, балки минг йил, кўзим йўлда,  
Тупроқларга бир ҳикоя сўйлайверар.  
Рұҳим менинг икки дунё орасида,  
Ўша буюк муҳаббатни излайверар...

\* \* \*

Маним дилим тушунади ўзимни,  
Дилим ўқи, кўзимдаги сўзимни,  
Китоб бўлар йигсанг ҳар бир изимни,  
Кимнинг ишқи нурга кўммиш юзимни?

Гуноҳларим-қўулларимда кишандур,  
Савобларим-юрагимда гулшандур,  
Йўлим ўнги — гулу, сўли — тикондур,  
Сўзон висол кўпригидан ўтолмам,  
Кўкда кулган юлдузимга етолмам!

Кимлар қўли етмай ўтди дунёдан,  
Дил бермишим маним дилим ёнмоқда.  
Собир қилғил, ўзинг авра руҳимни,  
Муҳаббат деб бу дунёдан тонмоқда...

Тўрт тарафдан келар тўрт дил ноласи,  
Қулоқ солсам олам ёнар сўзидан.  
Юрак-ишқининг огули пиёласи,  
Бол томади унга кўнглим кўзидан.

Нетай Мажнун кўйин кўрдим бу танда,  
Қарогимда унинг бедор абри бор.  
Рақам этгил, қулоқ тутсанг, дил манда,  
На Насими, на Машрабнинг сабри бор  
Етай десам, дилим минг бир айби бор!

Сўзон висол кўпригидан ўтолмам,  
Кўкда кулган юлдузимга етолмам!...

## МЕН КИМ – ИШҚНИНГ ОЖИЗ БУЛБУЛИ...

Лабингдаги қизгалдоқ-қуёш,  
Киприкларинг-мардуми лашкар.  
Юлдузларми-кўзингдаги ёш,  
Сўзинг оят-уйгонар башар.

Насимларми-нафис нафасинг,  
Гиёҳларми-назаринг гули.  
Баҳорларми-энтикан сасинг,  
Мен ким-ишқининг ожиз булбули.

Исминг айтсам руҳим уйгонар,  
Кўзларимга сигмайди аксинг.  
Дилим ишқча қачон қонади  
Бунча гўзал дунё-қафасинг!

Дилимдаги ёнган ул шафақ,  
Халложми ё Машраб жунуни.  
Минг кундуздан аъло эмасми,  
Буюк эҳсон — у қадр туни.

Энтикади қўнгил ёд этса,  
Тупроқ минг-минг ошиқ туроби.  
Дилимнинг энг чуқур тубида  
Ошиқликниң муқаддас хоби.

Э воҳ, бу дил гарчи кўксимда,  
Унга етмоқ мушкули жабр.  
Нетай мени ичкари қўймас.  
Вужудим-нағе кўмилган қабр.

Аналҳақнинг майин нўш этган,  
Ошиқларнинг сўзлари қани.  
Эй насимлар, тур денг, уйғотинг,  
Нағсдан улуғ ошиқлик шаъни.

Дил мозорин багринг тилкалаб  
Чиқармикин бир кун бойчечак.  
Учармикин руҳим эркалаб  
Ва ё барি ушталмас эртак.

Мен бир зарра, бир қатим нуринг,  
Бир сўзингман ёзилган оққа.  
Билмам бир жун ҳаққим бўларми  
Менинг аслим офтоб демоққа...

\* \* \*

Истиғфор айтамлан, бир зиё бергил,  
Муҳаббат мен мянгу асиринг бўлай.

Лайлу-наҳоримга бир нигор бергил,  
Қизгалдоқ, косанг оч уни бир кўрай!

Зиёрат айлайнин баҳор меҳробин,  
Гунчалар қадаҳин олиб қўлимга.  
Ичайнин парилар берган гулобин,  
Юлдузлар сочсинлар оташ йўлимга.

Комила самонинг кабир кўксидаги  
Бу ўтли юрагим бир сиқим тупроқ.  
Зорларим тўлғониб чиқар меърожга,  
Қизгалдоқ эк унга муҳаббат кўпроқ!

Умримга берса гар илоҳий сайқал,  
Масъуд тунларимнинг кавкаби ёниб.  
Соҳирлар кўксима ёзсалар зарҳал  
Бошимни эгаман сенга ишониб,  
Икки жаҳон ичра тиз чўкиб масур...

## ТОНГ

Такбир айтар субҳидамда какликлар,  
Харсангларнинг кенг багрида шодланиб.  
Кун нуридан ёришади жарликлар,  
Қизгалдоқлар юз очади шодланиб.

Кийикларнинг оқ ҳоллари юлдуздай,  
Қўзларимга қувонч берар, завқ берар.  
Хонқизилар мудрашади ҳур қиздай,  
Атиргулга энгашиб кўргим келар.

Шаббодалар тоғдан тушар қишлоққа,  
Тунда кулган бойқушлар ҳам жим бўлди.  
Гулоб сочиб, нур улашиб ҳар ёққа,  
Ойбулоқда юз чайган ул, ким бўлди?

Сенми ўша, поклаб тонгни уйғотган,  
Менми, гафлат уйқусида донг қотган.  
Йўлларингда кўз тикиб тун ўлтиридим,  
Кўзим очсан кечикибман... тонг отган.

\* \* \*

Ёлгизлик қийнайди, азоби огир  
Жисмим ҳам бегона, ёт каби юрак.  
Бунчалар танҳодир бу ўксик бағир,  
Руҳимга бир сирдош, бир маҳрам керак.

Чирқиллаб кезар у еру самони,  
Гуллар косасига бир-бир боқади.  
Наҳот, у ёлғиздир энди тамоми,  
Қўксига у согинч гулин тақади.

Киприкдан томади алвон лолалар,  
Учқур ўйларим ҳам кўкка учолмас.  
Гоҳ хаёл тиклайди унинг суратин,  
Аммо хаёлларга юрак кўчолмас.

О, руҳим бунчалар қийнадинг жисмим,  
Келгил, воз кечайлик йўқса бу дилдан.  
Не қиласай у тилга олмаса исмим,  
Не қиласай хабар йўқ, кўқдаги гулдан.

Асли бу дунёда ёлгиз сен эмас,  
Барча дил согинган, қайдай у зиё?  
Бу фироқ фаслида яшадим демас,  
Ёлгизлар дунёси асли бу дунё!

Дийдор деб яшайди ёлгизлар бари,  
Согинч ёр эканки бу ҳам бир шараф.  
Бир кун бор висолнинг келар хабари,  
Не тонг, дийдорига қилса мушарраф.

Сабр эт, эй руҳим, сабр-саодат,  
Бу жисмим ичра сен муҳожир — гариб.

Паймона тўлмасдан кетмоқ на ҳожат,  
Бир кун қизғалдоғинг келар ахтариб,

Сабр эт,  
Сабр эт,  
Муҳожир руҳим...

\* \* \*

Мен ҳар дам, ҳар лаҳза сени кутардим,  
Кўнглим йўлларингда поёндоз эди.  
Ҳисларим кўнглимнинг догин ютарди,  
Юрагим гўёки жойнамоз эди.

Кўзларим чор тараф унсиз нидо-ла,  
Исмингни улуғлаб айтарди аzon.  
Субҳидам очилган пок гуллар каби,  
Пойингда ўлтириб дийдор дерди жон.

Сенчи, сен келмасдинг, кўринмас эдинг  
Аммо борлиғингни сезарди дилим.  
Кўнглим ифорларга тўлган кез шодон,  
Қалбга меҳмонлигинг билардим, гулим.

Сен менинг жонимга пок нурлар тўшаб,  
Исмингни муҳрлаб қайтсанг-да гоҳи.  
Дунёга қўшиқдай таралар эди,  
Сени чорлаган дил фарёди, оҳи.

Қалбим баҳорингда очилди гулдай,  
Исмингни шивирлаб ўтар ҳар оним.  
Менинг мезбонлигим узоққа бормас,  
Қошингга боргувчи меҳмонман, жоним...

\* \* \*

Дунё тингла, тингла мени  
Хастадир бу кун жоним.

Эй малаклар, келтирингиз,  
Хайёмда қолган жомим.

Безиё ул хонақоҳни  
Парчаланг, йўлга боқинг.  
Йўл қоронгу бўлса гар,  
Жисм аро жонни ёқинг.

Воҳидим, восил эмасман,  
Восафо бўлмас кўнгил.  
Ахтари ўзга демасман,  
Ўзгадин тўлмас кўнгил.

Афгор ул — жисм аро жон,  
Сенга гам, эй дил, ман.  
Бу муҳаббат йўли қон,  
Кетди дил, бедилман!

\* \* \*

Чидайсан, дўстларинг қилса хиёнат,  
Кўтариб яшарсан дилда ранжини.  
Севгидан топмасанг магар ҳимоят,  
Бир куни юварсан алам зангини.

Чидайсан, хорликка, гаму-армонга,  
Чидайсан, жисмингда уйгонган дардга.  
Шундай қисмат гоҳо ёрдир инсонга,  
Ёлчирсан бегумон бирор ҳамдардга.

Чидарсан, қалб гулинг сўлса фироқдан,  
Чидарсан, панд берса сирдош-гуруҳинг.  
Айрилсанг Ҳақ берган ёлғиз чироқдан -  
Вужуддан норизо яшаса руҳинг,  
Чидай оласанми...

\* \* \*

Бу дил бирла ишқ әлига  
Бороримга ишончим бор.  
Эй ёр, ишқдин кўнгил сўзон,  
Шароримга ишончим бор.

Васл йўлин дема азоб,  
Бу йўлдан қайтарим йўқдир.  
Сени дейман қиёмат то,  
Қароримга ишончим бор.

Сен эй, наргиз, дилинг нурин,  
Дилимга боғладинг, нетдинг.  
Кезиб дунё, сени излаб,  
Сўроримга ишончим бор.

Десанг, юлдуз сочиб кўкка,  
Манга мунчоқ этиб бер, деб,  
Абрлар аргумоқ бўлгай,  
Тероримга ишончим бор.

Юзинг кўрсат, куйиб ўлмам,  
Манга асло завол йўқдур.  
У кул ичра-ки қақнусдай,  
Туроримга ишончим бор.

Дема Машраб, дема Халлож,  
Насимий сабри йўқ санда,  
Ки дор тиклаб азоб бергил,  
Яроримга ишончим бор.

Бу қат-қат пардалар гарчи,  
Эй ёр, чеҳранг яширгайдур.  
Дилим кўзгу бўлиб, бир кун,  
Кўроримга ишончим бор.

\* \* \*

Йиллар ўтди умр китобин,  
Саҳифасин бир-бир вароқлаб.  
Йиллар ўтди кўнгил офтобин,  
Қаро қилиб, бағрини дөглаб.

Гунчаларнинг кулгуси унут  
Ҳазонларнинг шивири дилда.  
Ёшлигимнинг баёт-қўшиги,  
Қайтмай кетган ўша булбулда.

Қизғалдоқлар, йигламанг, кулинг  
Наҳот сизни пайқамай кетсам.  
Йўқ, тупроқ ҳам кечирмас асло  
Баҳорларда гулламай ўтсам...

# МУНДАРИЖА

«РУҲИМГА ПОК МАЪВОЛАР КЕРАК»..... 3

## ГУЛЛАШ ПАЙТИ КЕЛДИ, БОГЛАРИМ

«Гиёҳлардан сўрдим сенинг таърифинг...».....	7
Ватан.....	8
«Юрт йўллари — муқаддас йўллар...».....	9
Халқ.....	10
«Ёрсизсан деманг ҳаргиз...».....	11
Ҳақиқат чечаги.....	12
«Қизгалдоқлар қироат қиласар...».....	13
«Меҳру муҳаббатдан сўз очсалар гоҳ...».....	13
«Булбулларнинг нафаси кўксимга урилади...».....	14
Тунги ўйлар.....	16
«Софинаман...».....	17
Софинч салтанати (турқумдан).....	18
Тўхтагил ёшлигим.....	19

## МУҲАББАТ ҚАРШИНГДА БУ ЖОНИМ НАДИР

«Дунёга боқдиму ишондим энди...».....	21
Баҳор бўлиб кел.....	21
«Муҳаббат йўл эди...».....	22
«Ёмғир ёғар...».....	24
«Қанча кутган эдим...».....	24
«Эй дил...».....	25
Қалбим меҳмони.....	26
Қиши эртаги.....	27
Орзудаги муҳаббат ҳақида қўшиқ.....	28
Таскин.....	29
Шивирлама, шаббода.....	30
«Бахт чорлайсан...».....	30
«Сендаи қолди...».....	32
«Бунчалар девона, телбасан кўнгил...».....	32
«Муҳаббат қаршингда...».....	32
«Тотли эди бир вақтлар дунё...».....	32

<b>АНДИЖОН, БУ — СИЗСИЗ ОНАЖОН</b>	
Сизга багишлайман топган қадримни.....	35
«Офтоб мисли доя момодек...».....	36
Тақдир йўли.....	36
Андижон, бу — сизсиз онажон.....	37
«Омонатдир менга берилган имкон...».....	38
Аёл.....	39
Хаёли соғинчлар.....	40
«Бугун тушларимга кирибсиз она...».....	41
«Ёлғизлиқдан эзилар кўнгил...».....	41
«Яна янги йил келмоқда...».....	42
<b>ДИЛИМ ҚУЁШИДАН ЁРИШСИН ЮЗИМ</b>	
«Шеър ўзи нимадир...».....	44
«Сендан нени кутиб яшайман...».....	44
«Бошим қуийи эгдим...».....	45
«Маним дилим...».....	45
Мен ким — ишқнинг ожиз булбули.....	46
«Истиғфор айтаман...».....	47
Тонг.....	48
«Ёлғизлик қийнайди...».....	49
«Мен ҳар дам...».....	50
«Дунё тингла...».....	50
«Чидайсан дўстларинг қилса хиёнат...».....	51
«Бу дил бирла...».....	52
«Йиллар ўтди...».....	53